

NOGOMETNI/FUDBALSKI SAVEZ BOSNE I HERCEGOVINE



Pravilnik o posrednicima

Nogometnog/Fudbalskog saveza Bosne i Hercegovine

Sarajevo, juni/lipanj 2017.

SADRŽAJ

I Djelokrug i definicija zastupnika.....
II Opšti principi (angažovanje posrednika).....
III Registrovanje posrednika.....
IV Zahtjevi za registrovanje.....
V Ugovor o posredovanju.....
VI Prava i obveze posrednika.....
VII Prava i obveze igrača.....
VIII Prava i obveze klubova.....
IX Dostavljanje i objavljivanje.....
X Plaćanja posrednicima.....
XI Sukob interesa.....
XII Sporovi igrača i/ili klubova i posrednika.....
XIII Disciplinski postupak.....
XIV Prelazne i završne odredbe.....
Dodatak 1	
Popis dokumentacije za registraciju.....
Dodatak 2	
Posrednička izjava za fizička lica.....
Dodatak 3	
Posrednička izjava za pravna lica.....

Na osnovu člana 35. Statuta Nogometnog/Fudbalskog saveza Bosne i Hercegovine, a u skladu sa FIFA Propisima o radu s posrednicima, Izvršni odbor Nogometnog/Fudbalskog saveza Bosne i Hercegovine, na sjednici održanoj 01.07.2017. godine, donio je

PRAVILNIK O POSREDNICIMA

Nogometnog/Fudbalskog saveza Bosne i Hercegovine

I Djelokrug i definicija posrednika

Član 1.

(1) Odredbe ovog Pravilnika odnose se na angažovanje usluga posrednika od strane igrača i klubova u cilju:

- a) zaključenja ugovora o radu između igrača i kluba;
- b) zaključenja sporazuma o transferu igrača između klubova.

(2) Primjena ovog Pravilnika ograničena je na djelatnosti posrednika koje su opisane u stavu 1. ovog člana. Ovaj Pravilnik ne obuhvata niti jednu drugu uslugu koju posrednik može pružiti drugim stranama, kao što su treneri.

(3) Posrednik u smislu ovog Pravilnika je fizičko ili pravno lice koje uz naknadu ili bez naknade, u pregovorima posreduje i/ili zastupa igrača i/ili klubove, u cilju zaključivanja ugovora o radu ili u pregovorima posreduje i/ili zastupa igrača i/ili klubove u cilju zaključivanja sporazuma o transferu.

(4) Klijent je igrač ili klub koji ima zaključen ugovor o zastupanju s posrednikom.

(5) Ugovor o radu u kontekstu ovog pravilnika može biti:

- ugovor o radu igrača profesionalca;
- ugovor igrača amatera.

(6) Transfer je postupak prelaza igrača iz kluba u kojem je bio registrovan u klub za koji će biti registrovan uz uslov da igrač s novim klubom zaključi ugovor o radu u smislu člana 1. ovog Pravilnika.

(7) Termini koji se odnose na fizička lica važe za oba pola, kao i za pravna lica. Svaki termin u jedini važi i za množinu i obrnuto.

(8) Ranije zaključeni ugovori o radu i/ili sporazumi o transferima ostaju na snazi, bez obzira na važenje i primjenu ovog Pravilnika.

II Opšti principi (Angažovanje posrednika)

Član 2.

(1) Igrači i klubovi imaju pravo da angažuju usluge posrednika kada zaključuju ugovore o radu i/ili sporazume o transferu.

(2) U postupku izbora i angažovanja posrednika, igrači i klubovi obavezni su postupati uz dužnu pažnju. Pod dužnom pažnjom podrazumijeva se da igrači i klubovi ulažu razumne napore u osiguraju da posrednici potpišu relevantnu izjavu posrednika i ugovor o posredovanju zaključen između strana.

(3) Kada je u transakcije angažovan posrednik, isti mora biti registrovan u skladu sa Članom 3. ovog Pravilnika.

(4) Igračima i klubovima je zabranjeno da kao posrednike angažuju službena lica, kako je definisano u tački 13. odjeljka „Definicije“ Statuta FIFA-e. Tačka 11. odjeljka „Definicije“ Statuta FIFA-e službena lica definiše kao: svaki član odbora, komisije, sudija ili pomoćni sudija, selektor, trener i ostala lica odgovorna za stručna, medicinska ili administrativna pitanja u FIFA-i, konfederaciji, savezu, ligi ili klubu kao i sva druga lica obavezna da poštuju Statut FIFA-e osim igrača i posrednika.

III Registrovanje posrednika

Član 3.

(1) NS/FS BiH vodi registar posrednika. U ovaj registar moraju biti registrovani posrednici svaki put kada su individualno uključeni u pojedinačni posao koji se odnosi na:

- a) zaključenje ugovora o radu između igrača i kluba koji je pridružen NS/FS BiH, ili
- b) zaključenje ugovora o transferu između dva kluba od kojih je barem jedan pridružen NS/FS BiH.

(2) Ukoliko je igrač koji je angažovao usluge posrednika potpisao ugovor o radu sa klubom pridruženim NS/FS BiH, mora za potrebe registracije dostaviti klubu, ili direktno NS/FS BiH, svu dokumentaciju iz Dodatka 1 ovog Pravilnika. Ukoliko igrač odluči dostaviti dokumenta direktno NS/FS BiH, dužan je to izvršiti lično ili preporučenom poštom.

(3) U slučaju ponovnog pregovaranja o ugovoru o radu (svaka izmjena, odnosno produženje ugovora) igrač koji angažuje usluge posrednika dužan je istu dokumentaciju iz stava 2. ovog člana dostaviti NS/FS BiH.

(4) Klub koji je angažovao usluge posrednika prema članu 1. st. 2. b) ovog Pravilnika, mora za potrebe registracije dostaviti NS/FS BiH svu dokumentaciju iz Dodatka 1 ovog pravilnika.

(5) Naprijed navedene aktivnosti od strane igrača i klubova, moraju se izvršiti svaki put kada se vrši angažovanje usluga posrednika od strane igrača i klubova.

(6) Poslove u vezi sa registracijom posrednika, te svim ostalim poslovima vezanim za prava i obaveze posrednika, igrača i klubova koji koriste usluge posrednika, obavlja stručna služba NS/FS BiH.

IV Zahtjevi za registrovanje

Član 4.

(1) Posrednik, da bi se registrovao u registar posrednika NS/FS BiH, mora ispunjavati uslove iz ovog Pravilnika koji dokazuju njegovu besprijekornost u radu, što će se cijeliti u svakom konkretnom slučaju. S tim u vezi, posrednik je obavezan dostaviti (uz ostalu dokumentaciju) i dokaz da se protiv njega ne vodi krivični postupak.

(2) Ukoliko je posrednik pravno lice, pojedinci koji zastupaju to pravno lice u okviru predmetne transakcije, moraju ispunjavati uslove iz ovog pravilnika, što dokazuje njihovu besprijekornost u radu, koja se cijeli u svakom konkretnom slučaju. S tim u vezi, pojedinci su obavezni dostaviti (uz ostalu dokumentaciju) i dokaz da se protiv njih ne vodi krivični postupak.

(3) NS/FS BiH se mora uvjeriti da posrednik kojeg je angažovao igrač i/ili klub pri vršenju svojih poslova, nema ugovorni odnos s ligama, asocijacijama, konfederacijama ili FIFA-om koji bi mogao dovesti do potencijalnog sukoba interesa. Posrednicima se zabranjuje da, direktno ili indirektno, učestvuju u gore navedenim aktivnostima ako postoji neki ugovorni odnos s ligama, asocijacijama, konfederacijama ili FIFA-om.

V Ugovor o posredovanju

Član 5.

(1) Klubovi i igrači su dužni da u ugovoru o posredovanju defenišu prirodu pravnih odnosa koje imaju sa svojim posrednicima, odnosno, da li poslovne aktivnosti posrednika znače pružanje usluga, savjetovanje, zapošljavanje ili neki drugi pravni odnos.

(2) Ugovor o posredovanju zaključuje se u pismenoj formi, a mora sadržavati minimalno sljedeće podatke: imena i prezimena strana, obim usluga, trajanje pravnog odnosa, iznos naknade koja se plaća posredniku, opšte uslove plaćanja, datum zaključenja ugovora, odredbe o prekidu ugovora i potpise ugovornih strana.

(3) Ukoliko je igrač maloljetan, ugovor o posredovanju moraju potpisati i igračevi zakonski zastupnici skladu sa nacionalnim zakonima Bosne i Hercegovine, te mora biti ovjeren kod notara.

(4) Ugovor o posredovanju koji posrednik zaključi s igračem i/ili klubom u skladu sa ovim članom, mora biti deponovan kod administracije NS/FS BiH prilikom registracije posrednika. Ukoliko ugovor nije deponovan smatra se da ne postoji.

(5) Ugovor o zastupanju može se zaključiti u trajanju od najviše dvije godine, te se ne može prešutno ili automatski produžiti. Za svako sljedeće razdoblje od najviše dvije godine obavezno je zaključivanje novog pisanog ugovora.

(6) Odredbe sadržane u ovom članu ne isključuju pravo klijenta da zaključi ugovor o radu ili ugovor o transferu bez pomoći posrednika.

VI Prava i obveze posrednika

Član 6.

(1) Posrednici imaju pravo:

a) kontaktirati svakog igrača koji nema ugovor o ekskluzivnom zastupanju s drugim posrednikom;

b) zastupati interese svakog igrača ili kluba s kojima ima zaključen ugovor o zastupanju.

(2) Posrednicima je zabranjeno pristupati bilo kojem igraču koji ima ugovor s klubom s ciljem da ga nagovori da prijevremeno raskine svoj ugovor ili povrijedi bilo koju obavezu koja je sadržana u njegovom ugovoru o radu.

(3) Svaki posrednik osigurat će da se njegovo ime, prezime i potpis te ime, prezime i potpis njegovog klijenta nalazi u svakom ugovoru čije je potpisivanje rezultat poslova u kojima je on učestvovao.

Član 7.

(1) Posrednici su obvezni poštovati i pridržavati se statuta, pravilnika, uputa i odluka nadležnih tijela FIFA-e, kontinentalnih konfederacija i NS/FS BiH, kao i zakona koji regulišu zapošljavanje na teritoriji Bosne i Hercegovine.

(2) Posrednici garantuju da svaki posao koji bude zaključen kao rezultat njihovog angažmana bude u skladu s odredbama prije spomenutih statuta, pravilnika, uputa i odluka nadležnih tijela FIFA-e, kontinentalnih konfederacija, NS/FS BiH, kao i zakona Bosne i Hercegovine.

(3) Posrednici trebaju, prilikom svakog posla u čijem zaključenju učestvuju, potpisati izjave iz Dodatka 2 i/ili 3 ovog Pravilnika. Kopiju izjave posrednici predaju igraču i/ili klubu.

(4) Posredniku koji se ne pridržava obaveza iz ovog člana, NS/FS BiH će uskratiti njegovu registraciju i registraciju ugovora u čijem je zaključenju on učestvovao.

VII Prava i obveze igrača

Član 8.

(1) Igrač može angažovati posrednika da ga zastupa u pregovorima ili ponovnim pregovorima u vezi ugovora o radu.

(2) Igrač ne može zaključiti ugovor o zastupanju s posrednikom ukoliko nije osigurao da taj posrednik potpiše odgovarajuće Izjave posrednika iz Dodatka 2 i/ili 3 ovog Pravilnika.

Član 9.

(1) Igrač treba osigurati da svaki ugovor zaključen kao rezultat pregovora koje je obavio posrednik kojeg je angažovao, sadrži ime, prezime i potpis tog posrednika.

(2) Ukoliko igrač ne koristi usluge posrednika, igrač treba osigurati da je ova činjenica izričito navedena u relevantnom ugovoru o radu.

VIII Prava i obveze klubova

Član 10.

(1) Klubovi imaju pravo angažovati posrednike da ih zastupaju u pregovorima o transferima igrača ili ugovorima o radu.

(2) Klub ne može zaključiti ugovor o zastupanju s posrednikom ukoliko nije osigurao da taj posrednik potpiše odgovarajuću Izjavu posrednika iz Dodatka 2 i/ili 3 ovog Pravilnika.

Član 11.

(1) Klub treba osigurati da svaki ugovor koji je zaključen kao rezultat pregovora koje je obavio posrednik kojeg je angažovao sadrži ime, prezime i potpis tog posrednika.

(2) Ukoliko klub ne koristi usluge posrednika, treba osigurati da je ova činjenica također izričito navedena u relevantnom ugovoru(ima) o transferu i/ili ugovoru(ima) o radu.

Član 12.

Klubovi će osigurati da se plaćanja koja jedan klub treba obaviti prema drugom klubu vezano za transfer, kao što su transferna naknada, naknada za treniranje ili solidarni doprinosi, ne obavljaju u korist posrednika, te da takva plaćanja ne obavljaju posrednici. To uključuje sva buduća prava koja bi proistekla iz navedenih osnovnih prava kluba ili prava na buduću transfernu vrijednost igrača. Zabranjeno je ustupanje ranije navedenih prava.

IX Dostavljanje i objavljivanje

Član 13.

(1) Igrači i/ili klubovi dužni su NS/FS BiH dostaviti sljedeće podatke:

- ugovor o posredovanju;
- ugovor o radu ili transferu;
- posredničku izjavu;
- sve pojedinosti o svim dogovorenim honorarima ili plaćanjima bilo koje prirode koje su platili ili trebaju platiti posredniku.

(2) Navedene podatke iz stava 1. ovog člana potrebno je dostaviti u roku od 15 (petnaest) dana nakon potpisivanja ugovora o radu ili ugovora o transferu.

(3) Nedostavljanje podataka iz stava 1. ovog člana predstavlja disciplinski prekršaj i biće sankcionisano prema odredbama Disciplinskog pravilnika NS/FS BiH.

(4) Pored toga, igrači i/ili klubovi su dužni nadležnim tijelima NS/FS BiH, UEFA-e i FIFA-e na njihov zahtjev za njihove istrage dostaviti i sve ugovore, sporazume i evidencije ili bilo koje druge informacije vezane za posrednike.

(5) Svi pomenuti ugovori moraju biti priloženi uz sporazum o transferu ili ugovor o radu, zavisno od konkretnog slučaja, za potrebe registracije igrača.

Igrači ili klubovi će osigurati da bilo koji sporazum o transferu ili ugovor o radu zaključen uz pomoć usluga posrednika sadrži ime i potpis tog posrednika.

U slučaju da igrač i/ili klub u svojim pregovorima nisu koristili usluge posrednika, pripadajuća dokumentacija koja se dostavlja u okviru predmetne registracije mora sadržavati prikaz te činjenice.

(6) NS/FS BiH je dužan krajem mjeseca marta svake kalendarske godine objaviti na svojoj zvaničnoj web stranici imena svih posrednika koje je registrovao, kao i pojedinačne transakcije u kojima su posrednici učestvovali.

Pored toga, NS/FS BiH je dužan objaviti ukupan iznos svih honorara ili isplata koje su njegovi registrovani igrači uplatili posrednicima i po svakom od svojih udruženih klubova.

Iznosi koje se objavljuju su konsolidovani ukupni iznosi za sve igrače i konsolidovani ukupni iznosi za klubove pojedinačno po klubu.

(7) NS/FS BiH takođe može igračima i klubovima staviti na raspolaganje bilo koje informacije koje se odnose na transakcije koje krše ove odredbe, a koje su relevantne za učinjene neregularnosti.

X Plaćanja posrednicima

Član 14.

(1) Iznos naknade koja se plaća posredniku angažovanom da postupa u ime igrača izračunavaće se na bazi osnovnog bruto prihoda igrača tokom cijelog trajanja ugovora.

(2) Klubovi koji angažuju usluge posrednika dužne su mu isplatiti naknadu plaćanjem paušalne sume dogovorene prije zaključivanja relevantne transakcije.

Ukoliko se postigne saglasnost, plaćanje može biti vršeno u ratama.

(3) Igrači i klubovi mogu primjenjivati sljedeće smjernice prilikom plaćanja posrednicima:

- a) Ukupan iznos naknade po transakciji koji se duguju posrednicima angažovanim da postupaju u ime igrača ne bi trebao prelaziti tri posto (3%) osnovnog bruto prihoda igrača tokom cijelog trajanja relevantnog ugovora o radu.
- b) Ukupan iznos naknade po transakciji koji se duguje posrednicima angažovanim da postupaju u ime kluba u cilju zaključivanja ugovora o radu s igračem ne bi trebao prelaziti tri posto (3%) eventualnog osnovnog bruto prihoda igrača tokom cijelog trajanja relevantnog ugovora o radu.
- c) Ukupan iznos naknade po transakciji koji se duguje posrednicima angažovanim da postupaju u ime kluba u cilju zaključivanja sporazuma o transferu ne bi trebao prelaziti tri posto (3%) eventualne naknade za transfer isplaćene u vezi s relevantnim transferom igrača.

(4) Klubovi su dužni osigurati da isplate koje jedan klub treba izvršiti prema drugom klubu u vezi transfera, kao što je obeštećenje za transfer, kompenzacija za treniranje ili solidarni doprinos, neće biti isplaćivane posrednicima i da se neće vršiti plaćanje posrednicima.

Ovo vrijedi, između ostalog, za posjedovanje interesa u bilo kojem obeštećenju za transfer ili nekoj budućoj vrijednosti transfera igrača.

Ustupanje potraživanja je također zabranjeno.

(5) Svako plaćanje usluga posredovanja posredniku će vršiti isključivo klijent posrednika u korist posrednika.

(6) Nakon zaključenja relevantne transakcije, a uz pristanak kluba, igrač može dati svoju pismenu saglasnost da klub izvrši plaćanje posredniku u igračevo ime. Plaćanje izvršeno u ime igrača mora biti u skladu s uslovima plaćanja koje su dogovorili igrač i posrednik.

(7) Službenim licima, kako su definisani uslovi u članu 2. stav 4 ovog Pravilnika, je zabranjeno da primaju bilo kakve uplate od posrednika po osnovu kompletne ili dijela naknade koja se plaća posredniku za transakciju.

Protiv svakog službenog lica koje prekrši ovu odredbu biće pokrenut disciplinski postupak.

(8) Igračima i/ili klubovima koji angažuju usluge posrednika za pregovaranje o ugovoru o radu i/ili sporazumu o transferu zabranjeno je da vrše bilo kakva plaćanja takvom posredniku ukoliko je predmetni igrač maloljetan.

XI Sukob interesa

Član 15.

(1) Prije angažovanja usluga posrednika, igrači i/ili klubovi dužni su osigurati uslov da ne postoji sukob interesa, niti da postoji vjerovatnoća da će se pojaviti sukob interesa bilo za igrače, bilo za posrednike.

(2) Smatraće se da ne postoji sukob interesa ukoliko posrednik pismeno objelodani eventualni stvarni ili potencijalni sukob interesa koji bi mogao imati s jednom od strana uključenih u predmet, vezano za transakciju, ugovor o posredovanju ili zajedničke interese, te ukoliko pribavi izričitu pismenu saglasnost svih ostalih uključenih strana prije početka pregovora.

(3) Ukoliko igrač i klub žele angažovati usluge istog posrednika u okviru iste transakcije pod uslovima utvrđenim u stavu 2. ovog člana, predmetni igrač i klub dužni su dati svoju izričitu pismenu saglasnost prije početka pregovora i dužni su pismeno potvrditi koja će strana (igrač ili klub) posredniku isplatiti naknadu. Strane se mogu dogovoriti i da će svaka isplatiti dio naknade posredniku.

(4) Strane su dužne obavijestiti NS/FS BiH o eventualnom takvom sporazumu i u skladu s istim dostaviti sve naprijed navedene pisane dokumente u toku procesa registracije.

XII Sporovi igrača i/ili klubova i posrednika

Član 16.

(1) U slučaju sporova između igrača i posrednika, odnosno kluba i posrednika, nadležan će biti redovan sud ili arbitraža koje ugovore obje strane, kako na nacionalnom, tako i na međunarodnom nivou.

(2) Za naprijed navedene sporove nije dopušteno ugovarati nadležnost organa NS/FS BiH ili FIFA-e.

XIII Disciplinski postupak

Član 17.

(1) Za nepoštivanje odredbi ovog pravilnika disciplinske mjere mogu izricati nadležni organi NS/FS BiH (nacionalni sporovi) ili nadležni organi FIFA-e (međunarodni sporovi).

(2) Disciplinski postupak može biti pokrenut na temelju prijave NS/FS BiH, igrača ili kluba, u skladu sa odredbama Disciplinskog pravilnika NS/FS BiH.

(3) Disciplinski postupak vode nadležni organi tj. u prvom stepenu Disciplinska komisija NS/FS BiH, a u drugom stepenu Apelaciona komisija NS/FS BiH. Odluka drugostepenog tijela – Apelacione komisije NS/FS BiH je konačna.

(4) Na tok postupka iz ovog člana primjenjuju se proceduralna i druga pravila utvrđena Disciplinskim pravilnikom NS/FS BiH.

(5) NS/FS BiH je obavezan na odgovarajući način objaviti izrečene disciplinske sankcije protiv nekog posrednika i o tome informisati FIFA-u, čiji će Disciplinski komitet tada odlučiti o proširenju sankcije kako bi imala dejstvo širom svijeta u skladu sa FIFA-inim Disciplinskim kodeksom.

XIV Prelazne i završne odredbe

Član 18.

(1) Ovaj pravilnik usvojen je na sjednici IO NS/FS BiH, održanoj dana 01.07.2017. godine i stupa na snagu dan nakon objave u „Službenom glasniku NS/FS BiH“.

(2) O svim pitanjima koja nisu obuhvaćena ovim pravilnikom odlučuje Izvršni odbor NS/FS BiH, u skladu sa propisima NS/FS BiH, UEFA-e i FIFA-e.

(3) Stupanjem na snagu ovog pravilnika prestaje važenje Pravilnika o zastupnicima igrača od 14.07.2015. godine.

PREDSJEDNIK
Elvedin Begić

POPIS DOKUMENTACIJE ZA REGISTRACIJU:

- ako je posrednik fizička osoba:

- a) Izjava posrednika - za fizičke osobe iz Dodatka 2 ovog Pravilnika
- b) Kopija posrednikovog pasoša
- c) Uvjerenje ne starije od 3 mjeseca izdano od nadležnog suda da se protiv posrednika ne vodi krivični postupak
- d) Ugovor o zastupanju
- e) Ugovor o transferu, ili
- f) Ugovor o radu
- g) Izjava o postojanju sukoba interesa te pisani pristanak svi strana uključenih u sukob interesa u smislu čl. 15 st. 3. ovog Pravilnika (ako je primjenjivo)
- h) Zajednička izjava igrača i kluba da žele angažovati istog posrednika i ko će od njih isplatiti posrednika u smislu čl. 15 st. 3. ovog Pravilnika (ako je primjenjivo)

- ako je posrednik pravna osoba:

- a) Izjava posrednika – za pravne osobe iz Dodatka 3 ovog Pravilnika
- b) Izvod iz sudskog registra – za pravne osobe (ne starije od mjesec dana)
- c) Izjava posrednika - za fizičke osobe iz Dodatka 2 ovog Pravilnika
- d) Kopija posrednikovog pasoša
- e) Uvjerenje ne starije od 3 mjeseca izdano od nadležnog suda da se protiv posrednika (pravna i fizička osoba) ne vodi krivični postupak;
- f) Ugovor o zastupanju
- g) Ugovor o transferu, ili
- h) Ugovor o zapošljavanju
- i) Zajednička izjava igrača i kluba da žele angažovati istog posrednika (ako je primjenjivo)
- j) Zajednička izjava igrača i kluba ko će isplatiti posrednika (ako je primjenjivo)

Posrednička izjava za fizička lica

Ime(na):

Prezime(na):

Datum rođenja:

Državljanstvo(a):

Kompletna stalna adresa (sa brojem telefona/faksa i e-mailom):

Ja,

(Ime(na), prezime(na) posrednika)

OVIM IZJAVLJUJEM SLJEDEĆE:

1. Obavezujem se da ću prilikom vršenja mojih aktivnosti u svojstvu posrednika poštovati i pridržavati se bilo koje obavezujuće odredbe važećih državnih i međunarodnih zakona, uključujući naročito one koji regulišu zapošljavanje. Pored toga, pristajem da budem obavezan statutima i propisima NS/FS BiH u kontekstu vršenja mojih aktivnosti u svojstvu posrednika.
2. Izjavljujem da trenutno ne vršim nikakvu funkciju službenog lica, kako je isti definisan u tački 11 odjeljka Definicija Statuta FIFA-e i članu 2. Stav 4. Pravilnika o posrednicima NS/FS BiH, niti ću u predvidljivoj budućnosti vršiti takvu funkciju.
3. Izjavljujem da je moja reputacija besprijekorna, a naročito potvrđujem da nisam pravosnažno kazneno osuđivan i da se ne vodim u registru osuđivanih lica zbog krivičnog djela učinjenog s umišljajem, za koje mi je izrečena kazna zatvora na 3 (tri) mjeseca i više. Takođe, potvrđujem da nisam pravosnažno kazneno osuđivan i da se ne vodim u registru osuđivanih lica zbog krivičnog djela iz oblasti sporta, bez obzira na vrstu kaznene sankcije.
4. Izjavljujem da nemam nikakav ugovorni odnos s NS/FS BiH, asocijacijama, konfederacijama ili FIFA-om koji bi mogao dovesti do potencijalnog sukoba interesa. U slučaju dvojbe, biće prikazan/dostavljen bilo koji relevantni ugovor.
5. Izjavljujem, u skladu sa Članom 14. stav 7. Pravilnika o posrednicima NS/FS BiH i Članom 7., stav 4 FIFA-inih Propisa o radu s posrednicima, da neću primati nikakve uplate koje jedan klub treba izvršiti prema drugom klubu u vezi s transferom kao što su obeštećenje za transfer, kompenzacija za treniranje ili solidarni doprinos.
6. Izjavljujem, u skladu sa Članom 14. stav 8. Pravilnika o posrednicima NS/FS BiH i Članom 7., stav 8. FIFA-inih Propisa o radu s posrednicima, da neću primati nikakve uplate od bilo koje strane ukoliko je predmetni igrač maloljetan, kako je definisano u tački 11 odjeljka Definicija u FIFA Propisima o statusu i transferu igrača.

7. Izjavljujem da neću učestvovati, ni direktno ni indirektno, niti se na drugi način povezivati sa klađenjem, kockanjem, lutrijama i sličnim događajima ili transakcijama vezano za nogometne utakmice. Prihvatam da mi je zabranjeno da imam udjele, bilo aktivno ili pasivno, u kompanijama, koncernima, organizacijama itd. koje promovišu, mešetare, organizuju ili vode takve događaje ili transakcije.
8. Dozvoljavam, u skladu sa Članom 13. Pravilnika o posrednicima NS/FS BiH i Članom 6., stav 1 FIFA-inih Propisa o radu s posrednicima, da NS/FS BiH pribavi pune podatke o bilo kojoj uplati bilo koje prirode koju mi doznači neki klub ili igrač za moje usluge u svojstvu posrednika.
9. Dozvoljavam, u skladu sa Članom 13. Pravilnika o posrednicima NS/FS BiH i Članom 6., stav 1 FIFA-inih Propisa o radu s posrednicima, da NS/FS BiH, konfederacije ili FIFA pribave, po potrebi, u svrhu njihovih istraga, sve ugovore, sporazume i evidencije u vezi s mojim aktivnostima u svojstvu posrednika. Isto tako, dozvoljavam da gore pomenuta tijela pribave i bilo koju drugu relevantnu dokumentaciju od bilo koje druge strane koja savjetuje, pospješuje ili uzima aktivno učešće u pregovorima za koje sam ja odgovoran.
10. Dozvoljavam, u skladu sa Članom 13. Pravilnika o posrednicima NS/FS BiH i Članom 6., stav 3 FIFA-inih Propisa o radu s posrednicima, da NS/FS BiH drži u posjedu i obrađuje bilo koje podatke za potrebe njihovog objavljivanja.
11. Dozvoljavam, u skladu sa Članom 17. Pravilnika o posrednicima NS/FS BiH i Članom 9., stav 2 FIFA-inih Propisa o radu s posrednicima, da NS/FS BiH objavi pojedinosti o eventualnim disciplinskim sankcijama koje su mi izrečene i o istima obavijesti FIFA-u.
12. U potpunosti sam svjestan i prihvatam da će ova izjava biti stavljena na raspolaganje članovima nadležnih tijela NS/FS BiH.
13. Napomene i opservacije koje mogu biti potencijalno relevantne:

.....
.....

Ovu izjavu dajem u dobroj vjeri, a njena istinitost se zasniva na informacijama i materijalima koji su mi trenutačno dostupni, i slažem se da NS/FS BiH ima pravo provesti provjere koje mogu biti neophodne za verifikovanje informacija iz ove izjave. Takođe prihvatam da sam podnošenjem ove izjave, u slučaju da se gorepomenute informacije promijene, dužan NS/FS BiH smjesta obavijestiti o takvim izmjenama.

(Mjesto i datum)

(Potpis)

Posrednička izjava za pravna lica

Naziv kompanije (pravnog lica/subjekta):

Adresa kompanije (sa brojem telefona/faksa, e-mejlom i web-adresom)

U daljem tekstu „kompanija“.

Ime(na) i prezime(na) pojedin(a)ca koji je(su) pravovaljano ovlašten(i) za zastupanje gore navedene kompanije (pravnog lica/subjekta):

(NB: svaki pojedinac koji postupa u ime kompanije dužan je popuniti posebnu Posredničku izjavu)

Ja,

(Ime(na), prezime(na) pojedinca koji zastupa pravno lice/subjekt)

koji sam pravovaljano ovlašten za zastupanje kompanije

OVIM IZJAVLJUJEM SLJEDEĆE:

1. Obavezujem se da ćemo kompanija koju zastupam i ja poštovati i pridržavati se bilo koje obavezujuće odredbe važećih državnih i međunarodnih zakona, uključujući naročito one koji regulišu zapošljavanje, prilikom vršenja mojih aktivnosti u svojstvu posrednika. Pored toga, izjavljujem da kompanija koju zastupam i ja pristajemo da budemo obavezani statutima i propisima NS/FS BiH u kontekstu vršenja aktivnosti u svojstvu posrednika.
2. Izjavljujem da trenutno ne vršim nikakvu funkciju službenog lica, kako je isti definisan u tački 11 odjeljka Definicija Statuta FIFA-e i članu 2. Stav 4. Pravilnika o posrednicima NS/FS BiH, niti ću u predvidljivoj budućnosti vršiti takvu funkciju.
3. Izjavljujem da je moja reputacija besprijekorna, a naročito potvrđujem da nisam pravosnažno kazneno osuđivan i da se ne vodim u registru osuđivanih lica zbog krivičnog djela učinjenog s umišljajem, za koje mi je izrečena kazna zatvora na 3 (tri) mjeseca i više. Takođe, potvrđujem da nisam pravosnažno kazneno osuđivan i da se ne vodim u registru osuđivanih lica zbog krivičnog djela iz oblasti sporta, bez obzira na vrstu kaznene sankcije.
4. Izjavljujem da ni kompanija koju zastupam ni ja nemamo nikakav ugovorni odnos s NS/FS BiH, asocijacijama, konfederacijama ili FIFA-om koji bi mogli dovesti do potencijalnog sukoba interesa. U slučaju ikakve dvojbe, biće prikazan bilo koji relevantni ugovor.

5. Izjavljujem, u skladu sa Članom 14. stav 7. Pravilnika o posrednicima NS/FS BiH i Članom 7., stav 4 FIFA-inih Propisa o radu s posrednicima, da ni kompanija koju zastupam ni ja nećemo primati nikakve uplate koje jedan klub treba izvršiti prema drugom klubu u vezi s transferom kao što je obeštećenje za transfer, kompenzacija za treniranje ili solidarni doprinos.
6. Izjavljujem, u skladu sa Članom 14. stav 8. Pravilnika o posrednicima NS/FS BiH i Članom 7., stav 8 FIFA-inih Propisa o radu s posrednicima, da ni kompanija koju zastupam ni ja nećemo primati nikakve uplate od bilo koje strane ukoliko je predmetni igrač maloljetan, kako je definisano u tački 11. odjeljka Definicija u FIFA Propisima o statusu i transferu igrača.
7. Izjavljujem da ni kompanija koju zastupam ni ja nećemo učestvovati, ni direktno ni indirektno, niti se na drugi način povezivati sa klađenjem, kockanjem, lutrijama i sličnim događajima ili transakcijama vezano za nogometne utakmice. Prihvatam da je i kompaniji koju zastupam i meni zabranjeno da držimo udjele, bilo aktivno ili pasivno, u kompanijama, koncernima, organizacijama itd. koje promovišu, mešetare, organizuju ili vode takve događaje ili transakcije.
8. U ime kompanije koju zastupam, dozvoljavam, u skladu sa Članom 13. Pravilnika o posrednicima NS/FS BiH i Članom 6., stav 1. FIFA-inih Propisa o radu s posrednicima, da NS/FS BiH pribavlja pune podatke o bilo kojoj uplati bilo koje prirode koju kompaniji doznači neki klub ili igrač za njene usluge u svojstvu posrednika.
9. U ime kompanije koju zastupam, dozvoljavam, u skladu sa Članom 13. Pravilnika o posrednicima NS/FS BiH i Članom 6., stav 1. FIFA-inih Propisa o radu s posrednicima, da NS/FS BiH, konfederacije ili FIFA pribavljaju, po potrebi, u svrhu njihovih istraga, sve ugovore, sporazume i evidencije u vezi s aktivnostima u svojstvu posrednika kompanije. Isto tako, dozvoljavam da gorepomenuta tijela takođe pribave bilo koju drugu relevantnu dokumentaciju od bilo koje druge strane koja savjetuje, pospješuje ili uzima aktivno učešće u pregovorima za koje je odgovorna kompanija koju zastupam.
10. U ime kompanije koju zastupam, dozvoljavam, u skladu sa Članom 13. Pravilnika o posrednicima NS/FS BiH i Članom 6., stav 3. FIFA-inih Propisa o radu s posrednicima, da NS/FS BiH drži u u svom posjedu i obrađuje bilo koje podatke za potrebe njihovog objavljivanja.
11. U ime kompanije koju zastupam, dozvoljavam, u skladu sa Članom 17. Pravilnika o posrednicima NS/FS BiH i Članom 9., stav 2. FIFA-inih Propisa o radu s posrednicima, da NS/FS BiH objavi pojedinosti o eventualnim disciplinskim sankcijama koje su izrečene kompaniji koju zastupam i o istim obavijesti FIFA-u.
12. U potpunosti sam svjestan i prihvatam da će ova izjava biti stavljena na raspolaganje članovima nadležnih tijela NS/FS BiH.
13. Napomene i opservacije koje mogu biti potencijalno relevantne:

.....
.....

Ovu izjavu dajem u dobroj vjeri, a njena istinitost se zasniva na informacijama i materijalima koji su mi trenutačno dostupni, i slažem se da NS/FS BiH ima pravo provesti provjere koje mogu biti neophodne za verifikovanje informacija iz ove izjave. Takođe prihvatam da sam podnošenjem ove izjave, u slučaju da se gorepomenute informacije promijene, dužan NS/FS BiH smjesta obavijestiti o takvim izmjenama.

(Mjesto i datum)

(Potpis)